

## Jude di bura Ago di ini adina

*Mina bura bi Jude rofu ofa ofa oteimadedi vene, kaere bi mokena vari gira aededi vo nidedi, mina nidiba regika bura reyo. Mina sina tumu bi 2 Peter di ago kana. Ina bi ini bura vegedi vene egira regika, “ye Sei yaku ini vene mokena vari gira aena uru yokoi maka maro, ye mina moi gira reyaganedi.”*

### **Beika sina ideri**

*Ago di ini adina 1–2*

*Vegu no ma ofa ago oteimadedi vene 3–16*

*Yi mokena vari gira aenari are rei gira refa 17–23*

*Sei bi nibuni renadi 24–25*

<sup>1</sup> Mina bura bi na Jude, kaere bi Iesu Keriso di moimai rei tavoi reida amiye ma James di dubuini gutuna —✧

Mina bi Sei raka niyo vene rofu, ma kaere Baba Sei uka mado\* ma Iesu Keriso nari redo.

<sup>2</sup> Iriyeduka, uka amuta ma uka mana bi ya rofu boi tora niyaine.

### *Ofa ofa ago oteimadedi vene*

<sup>3</sup> Nai uka maida vene, na bi nai mokena tora noibanu dudu, una moi vegu rina sina vakoi resifa, mina ya rofu bura reida. Ye nai mokena bi

---

✧ **1:1:** Mt 13.55; Mk 6.3

\* **1:1:** uka mado; bura bedakai moi

kikifa redo nufa.

ya rofu bura resi ya egira regida, ye mokena vari gira aena di ruda reyagane, mina bi Sei yaku uru yokoi maka ini vene maro. <sup>4</sup> Adina be vene yaku yi rafuri, sui ida dudu sena baeyadi. Mina vene bi ini obini moyadi, mina bi sena bura reyadi. Ina bi Sei di vegu kana de rededi, kaere bi uni Sei di buni tora gade di sina moi idana risi vava maradi, vegu no resi Iesu Keriso uni ourefeidenana Amiye tora yokoi maka ma Varika amiye<sup>†</sup> mina nisui reyadi.

<sup>5</sup> Ya mina ago bi sena diba niyadi, mina resi nai ura bi dudusa ya nigida. Varika amiye<sup>‡</sup> yaku ini vene Egypt gaganiri gutuna moi vegu risi yakuyo. Idu, kaere ina rofu mokena vari gira de aeyadi, bi gabi ukero vau reyo. <sup>☆</sup> <sup>6</sup> Ma naivo naivo vima be, kaere bi ini moimai di vava moi gira de reyadi bi ini yava fereyadi. Ye bi toga toga amebigo seini aesi mukunari fereyo, ye kota rego meda tora nari reyaganedi. <sup>7</sup> Mina kana, Sodom ma Gomorrah ma ini adinari taoni ka koa resi roaita di vegu idana idana reyadi. Mina vene yaku toga toga vaido ita moka di esika esika moina mina amiye tau noibanu nioteimadedi kana. <sup>☆</sup>

<sup>8</sup> Mina ida kana, mina yaduka vededi vene yaku iniye ini roaita moi no risi ourefeidenana vene fufuta masi oma ideri amededi vene nifafana rededi. <sup>9</sup> Idu Michael, naivo naivo vima tora iniye, Bodakasa kayamo reyadi, kaere yaku Moses di roaita moigo mina. Mina medari,

---

<sup>†</sup> **1:4:** Bura bedakai ka Sei nufa. <sup>‡</sup> **1:5:** Varika amiye; bura bedakai Iesu, nufa. Mina bi Greek agori, idu Hebrew agori bi Joshua. <sup>☆</sup> **1:5:** Ex 12.51; Num 14.29-30 <sup>☆</sup> **1:7:** Gen 19.1-24

Michael iniye yaku Satani nifafana de reyo. Idu yomakai maka niyo, “Varika amiye yaku ini kavanaugh ya mago!”<sup>✧ 10</sup> Idu, mina vene bi beika baika tau toto, bi mina rofu nifafana rededi. Ina vene bi tuma dona nadina di mokena kana, mina beika baika diba niyadi ini amutenari, mina yaku ina vene moi no rido. <sup>11</sup> Iriyeduka iniye ina vene rofu! Adina bi Cain di ida moisi Balaam di no reyo ida kana, fore baku regi evade maka reyadi. Resi Korah<sup>§</sup> yaku Moses di ago obe reyo kana, ina ka makai resi muyeyadi.<sup>✧ 12</sup> Mina vene bi ekalesia vene di irakunari naguma kana, maena de iruku irigedi; iniye maka dogo rededi. Ina bi miya de redo seuya kana, aura yaku ufu redo. Bi yabo kakari meko varena de, ye muyena iniye reyainedi darusa yai rei makudedi kana. <sup>13</sup> Ina vene bi davara di ureure kana, ini maena bi davara di kabudo kana forafora rei baedo; bi yaveru kana, adina Sei yaku toga toga amebigo mukuna girigiri sana ferei maro.

<sup>14</sup> Enoch, Adam gutuna ini tutubena bi 7; ina yaku sena dobau mina vene dada niyo, “Neidefo, Varika amiye bi ini akeke vene tau gade gadesa dego,<sup>✧ 15</sup> ina vene tau kota resi vegu no rededi vene tau di vegu no tau niogau rego, mina kaere bi ini vegu no ida idari regamadi, ma ina yaku kiraini ago toe tau ina rofu nigamadi mina!”

<sup>16</sup> Mina vene bi ago mumugu vene, goidu no

---

✧ **1:9:** Deut 34.6; Dan 10.13, 21; 12.1; Zech 3.2; Rev 12.7    § **1:11:** Korah: Ina yaku Moses ma Aaron di ourefeiden rofu ruda reyo. Sei gubuyo iniye resi kono moi eboka reyo ma Korah ini usi dina venesa iriyo (Num 16.1–35 baku re).    ✧ **1:11:** Gen 4.3–8; Num 22.1–35    ✧ **1:14:** Gen 5.18, 21–24

be regedi maina vene; ina bi ini mokena tari rei didedi vene; iniye ini roka moi odoro vene, ma idana di roka moi odoro riyagane iniye di buni dada.

*Ago gira ma ni mama rena ago*

<sup>17</sup> Idu, ya uka maida asiyaka, va mokefo, beika uni Varika amiye Iesu Keriso di nifeidena vene sena niyadi mina. <sup>18</sup> Ina ya rofu niyadi bi, “Ari tumu nibigori, ninika nina vene kaere bi iniye di ini mokena no mina tari rei dibigedi.”<sup>✧</sup>

<sup>19</sup> Mina vene yaku utama ya okugedi, kaere bi ini amutenari ma Vima kikifa de mina tari rebigedi.

<sup>20</sup> Idu ya vene, nai uka maida asiyaka, ya kaya yi akeke mokena vari gira aena, mina fafau are rei gira resi Vima kikifa nufa usa usa nibifa. <sup>21</sup> Sei di uka mana fafau, are rei gira resi uni Varika amiye Iesu Keriso di iriyeduka nari refa, mina yaku toga toga ameibobina vegu rofu ya moi bogo.

<sup>22</sup> Kaere mokena remanu moibigedi vene rofu bi iriyeduka rebifa; <sup>23</sup> Be vene<sup>\*\*</sup> mina ita moka gutuna moi vegu rifa; be rofu bi ori dudu iriyeduka refa; iniye di varuka roaita di ura kino nufa, mina ka gubuyo refa.

*Sei nivakena di usa usa nina*

<sup>24</sup> Vabara ina rofu nigo, kaere yaku keto renari ya<sup>††</sup> moi are rego ma ada tora gade dudu, ini vabara iniye di budari, goina bi yi no yokoi de minari ya aego. <sup>25</sup> Ini adinari gutuna ma gua ma toga bi vabara, roka tora odoro iniye, ma vava

---

✧ **1:18:** 2 Pet 3.3      \*\* **1:23:** Bura bedakai ka ori dudu nufa.

†† **1:24:** ya; bura bedakai ina vene nufa.

Iesu Keriso uni Varika amiye dudu bi uni Sei, uni  
moi vegu rina amiye yokoi maka rofu toga toga  
ameibobigo! Rama.

**Sei di Uka Ago Ruaka  
Ruth and the New Testament in the Doromu-Koki  
Language of Papua New Guinea  
Rut na Nupela Testamen long tokples Doromu-Koki  
long Niugini**

copyright © 2011-2016 Wycliffe Bible Translators, Inc.

Language: Doromu-Koki

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-03-15

---

PDF generated using Haiola and XeLaTeX on 11 Nov 2022 from source files dated 9 Oct 2020

21189aa1-9850-5863-b4a2-22b21f2fbbe9